

Transkription von Urkunde ZET 1447a

Ort, Datierung: Zerbst, 1447-08-26

Signatur: Stadtarchiv Zerbst, IB, 560

Inhalt: Rat der Stadt Zerbst: Schuldurkunde

Wy Radmann der Stadt Czerwist Bekennen openbar in dussen vnse opene / Brife vor Allen de on
sehn horen adir lesen Dat wy recht vnde redeliken van / gheheites und(e) bevelunghe wege , des
hochgeborn Graüen Adolffes fursten / to Anhalt vnnses gnedigen hern vth synre wonliken orvede so
wy on de / jarliken plegen to geuen , Den vorsichtigen hermann Rabbÿne vnde Claws / vanderpope
vorstendere to Sunthe laurentz in der nygen stad magdeburg / drittich schogk older Crutz groschen So
geunge vnde geüe syn eyne vp to / nehmen vp sodanne dagetÿd Alse nw to dem(e) irsten vpp(e) Sunthe
mertens / daghe nha giffit dusses brifes to komen ouer eyn jar dat is nemliken / wan man scriffit nha
godes gebort (et cetera) in dem(e) achte vnde virtigisten jare / Theÿn schogk der suluen olden groschen
vnde denn der negest vppe den / anderen Sunthe mertens daghe dar negest dem(e) irsten volgende ouk
/ Theÿn schogk groschen vnde vppe den dridden sunthe mertens daghe nha / den irsten twen folgende
ouk Theÿn schogk groschen vorberuret geredet / vnd(e) gelouet hebben , ouk reden vnde louen in
crafft dusses brifes so vor/gescreuen stät gutliken vnd(e) wol to der genughe to geuen vnde to betalende
/ ane alles geuerdes vnd(e) argelist vnde wen wÿ denn so den obgnant(e)n / vorstender to sunthe
laurentz de vorgescreuen drittich schogk groschen / alse vorgescreuen stät gegeuen vnd(e) betalet
hebben , So schal dusse briff / denn meher machteloos vnd wÿ der betalinge vorder to donde dar van /
gequitet vnde geledich wesen ane alles geuerdes Des to orkunde / vnd(e) grotter wissenheit hett So
hebben wÿ dussen breff hir nedden / med vnsem(e) Secrete witliken lathen vorsegelen De gegeuen is
nha / (cristi) gebort vnnses hern verteynhundert dar nha in dem(e) seuen vnd(e) / virtigisten jare
Am(me) Sonnewende nha Sunthe Bartolomewes / daghe des hiligen Apostels